

Николай Николаевич Герасимов

Чужис 1956 вося ода-кора төлысь 19 лунö Кострома обласьтса Ключи грездын. 1978 воын отличиеон помалис М.В. Ломоносов нима Москваса канму университет «Геология да мупытшса озырлун куйлөдьяс туялөм» специальностьт серти.

Николай Николаевичлөн уджыс йитчöма Коми Республикаса геологиякөд. Геологсянь сійö быдмис öткымын предприятияса медыджыд директорöдз, вöли Коми Республикаса промышленностьт министрöн, Коми Республикаса промышленностьт да энергетика министрöн, Коми Республикаса Вескөдлан котырöн Юрнуöдысьöс вежысьöн – Коми Республикаса инвестиция, промышленностьт да транспорт министрöн.

Н.Н. Герасимов пунктис төдчана пай Парнокскöй куйлөд восьтöмö, доньялөмö, туялөмö да төдмалөмö. Сійö лоö куйлөдсö медводдза восьтысьяс пыись öтиöн.

Николай Николаевич босьтчис сöвмөдны 90-öд воясö киссьöм геология отрасльсö, пунктис ыджыд пай сійöс сöвмөдöмö сэк, кор уджалис Коми Республикаса промышленностьт министрöн, а сідзжö Куйлөдьяс перйöм серти Россия Федерацияса Вескөдлан котыр бердын комиссияö Коми Республикасянь пырысьöн. Уна вын Н.Н. Герасимов пунктис куйлөдьяс перьянінъясын да Ямалсянь магистральнöй биарупровод нюзөдигөн гөгöртас видзöмö.

Н.Н. Герасимов – геология да минералогия наукаса кандидат, геология да горнöй делö серти историк. Николай Николаевичлы сетöма «Шахтёръяслөн слава» III тшупöда пас, «Му пытшкöс туялөмын заслугаясысь» памятнöй пас, «Россияса горняк» зарни пас, «Россия Федерацияса нимöдана геолог» да «Коми Республикаса нимöдана уджалысь» почёт нимьяс.

Н.Н. Герасимов кувсис 2018 вося вöльгым төлысь 2 лунö.